

Msumbiji yazidi kufyeka magaidi

Uhuru 25/2/88

U. 25/2/88

MAPUTO, Msumbiji

MAJESHI ya serikali ya Msumbiji yaliwaua magaidi 37 na kuharibu kambi

zao kadhaa katika jimbo la Inhambane lililoko kusini mwa nchi hiyo mwezi aliopita, Shirika la habari la Msumbiji (AIM) liliripoti jana.

Lilisema magaidi 17 wa MNR waliuawa katika wilaya ya Homoine ambako magaidi waliwaua zaidi ya raia 400 na wengine 10 katika wilaya ya Morrumbene.

Shirika hilo ukikariri habari za kijeshi lilisema kambi moja ya magaidi hao ilikamatwa na majeshi ya serikali huko Guele, katika wilaya ya Panda.

Mjini Nairobi, Kenya, Shirika la Mpango wa Chakula la Umoja wa

Mataifa (WFP) limesema linatarajia kuona wakimbizi wengi kutoka Msumbiji kwenda nchi jirani yake mwaka huu kutokana na uhaba wa chakula na ukatili unaoendeshwa na magaidi hao.

Taarifa iliyopokewa Nairobi kutoka Rome, Italia, makao makuu ya shirika hilo, ilisema idadi ya raia wa Msumbiji katika Malawi itaongezeka na kufikia 600,000 ifikapo Desemba kutoka idadi ya 420,000 waliopo sasa.

Huko Swaziland kuna wakimbizi 22,500 wa Msumbiji, Zambia 30,000, Zimbabwe 64,500 na Tanzania 72,000, taarifa hiyo ilisema.